

# Migrants africans al cunfin svizzer

In problem per l'Italia

DA GUIU SOBIELA-CAANITZ

■ **La citad da Com (var 83 000 olmas) era impurtanta per nosa istorgia. «L'investgieu da C[om] è integrà en l'archidiocesa da Milaun. A quel han appartegnì da vegl ennà las plais dal Puschlav, da la Vuclina e dals contadis da Buorm e Clavenna» (1), sco er in gronda part da l'actual chantun Tessin.**

Oz è «Como San Giovanni» la staziun taliana da cunfin sin la viafier dal Gottard. Per tgi che less ir en Svizra e n'astga betg, è quai la staziun finala. Migrants che derivan d'in pajais «segir» na valan betg sco fugitivs e n'astgan perquai betg star en Svizra sco asilants. L'onn passà arrivavan a Com cunzunt fugitivs da l'Eritrea che pudevan far valair persecuziuns en lur pajais. Oz vegn oravant tut glieud da pajais segirs en l'Africa dal vest (Burkina Fasso, Ghana, Nigeria euv.).

## Ina pravenda lumbarda s'engascha

Ils 12 da fanadur ha «Le Courrier», gasetta quotidiana da Genevra, deditgà sias pp. 2-3 à la situaziun dals migrants africans a Com ed en l'Italia en general. A Com datti trais albierts per accoglienza temporara, in da la Crusch cotschna locala (400 plazs) e dus da la citad (40 e 60 plazs). La pravenda catolica da plevon don Giusto della Valle «dat alloschi permanent a 20 femnas, 25 umens e 12 famiglias en bajetgs differents (...). Il cunzun nigerian Johnson cumoda la vestgadira regalada per ils proxims migrants (...). Tscherts parochians na van pli a messa, ma don Giusto na vul betg chalar cun sia acziun da solidaritad (...). L'uniun 'Petit pied' (2) cumpiglia cunzunt



**A Como San Giovanni è la situaziun dals fugitivs per part desolata.**

glieud giuvna sut trenta onns e prova dad ir mintga sesavla emna en Italia per manar vestgadira, vivonda e rauba ordvart necessaria, e quai collavurond cun la pravenda da don Giusto. Damai ch'i vegn adina dapli femnas, tschertga 'Petit pied' vestgadira feminina ed artitgels d'igiene (...). Bliers migrants cumenzan a sa metter avant in futur en Italia (...). Ils numerus voluntaris da don Giusto instrueschan talian» (p. 2). Ina gronda part dals

migrants africans en Europa sbartgan en Italia. «En las davosas duas emnas èn sessanta arrivads a Com (...). Var 85 000 umans èn sbartgads en Italia dapi l'entschatta da l'onn tenor las cifras uffizialas da la regenza; quai munta 18 % dapi ch'il 2016, cur che l'Italia ha beneventà passa 181 000 umans. Il pajais retschaiva 75 % dals arrivs en Europa; per 2017 preves'ins var 200 000» (p. 3). Il «Tages-Anzeiger» dals 22 da fanadur scriva: «Jean-Claude

Juncker, parsura da la Cumissiun europeica, ha detg da matg a Firenze: 'L'Italia ha salvà l'onur da l'Europa' (...). Bels discurs recumpenseschan l'engaschi da l'Italia» (p. 12). Co va quai vinavant?

**1. Marco Dubini en: Stiftung Historisches Lexikon der Schweiz (ed.), Lexicon Istoric Retic, tom 1. Cuera (Desertina, ISBN 978-3-85637-390-0) 2010, p. 204, chavazzin «Com».**  
**2. Adressa electronica a Genevra: <http://association-petitpied.ch>**